

Darko Jeremić uhapšen na Karakaju

Direktor Autosemberije, preduzeća u sklopu Bobar grupacije, bio je u bjekstvu

Piše: **GORDANA KATANA**

Pripadnici Granične policije BiH su na zahtjev Državne agencije za istrage i zaštitu (SIPA) jučer ujutro na graničnom prelazu Karakaj uhapsili Darka Jeremića, jedinog osumnjičenog u slučaju Bobar banka koji dosad nije priveden, budući je bio u bjekstvu.

“Tužiteljstvo BiH još jednom ističe da postupa u skladu sa zakonom i najvišim profesionalnim standardima i odlučno odbacuje bilo kakve političke pritiske koji dolaze od ministra sigurnosti BiH”, poručili su jučer iz ove pravosudne institucije, potvrđivši još jednom koliko ih je zaboljela izjava Dragana Mektića o tome kako naša zemlja još čeka na prvu ozbiljnu presudu u borbi protiv korupcije.

Javnost u BiH prošle je nedjelje ostala iznenađena odlukom Suda BiH da direktoricama Investiciono-razvojne banke i Agencije za bankarstvo RS-a ukine kućni pritvor. Njih dvije, sa još osam osoba, uhapšene su ranije u sklopu iste akcije kodnog naziva Lavina. Na snazi su ostale mjere zabrane kontakta sa svjedocima, napuštanja BiH i povratka na posao. Njihovi branitelji odbijaju kontakt s medijima, jer ne žele ometati istragu. / STR. 2.



Dvije eksplozije odjeknule su sinoć na najvećem turskom aerodromu Ataturk u Istanbulu. Čula se i pucnjava iz vatrenog oružja. Turski ministar pravosuđa Bekir Bozdag rekao je da je najmanje 28 ljudi izgubilo život, a da je 60 ozlijeđeno. Tri napadača raznijela su se nakon što je na njih zapucala policija, nastojeći ih spriječiti da uđu u zgradu međunarodnog terminala. Nema nastradalih bh. građana. / REUTERS / STR. 14

Uhapšen bjegunac iz afere Bobar banka

Istraga u aferi koja je dovela do propasti banke teška je 280 miliona maraka, a iz državnog Tužilaštva najavljuju završetak istrage i odluku tužioca

Darko Jeremić (1975), ključni osumnjičeni u predmetu Bobar banka teškom 140 miliona eura, uhapšen je na graničnom prelazu Karakaj, između BiH i Srbije, potvrđeno je jučer iz Tužilaštva BiH. Uhapsili su ga pripadnici Granične policije, na zahtjev Državne agencije za istrage i zaštitu (SIPA), a u nastavku akcije Lavina, budući je on dosad bio u bjekstvu.

Složen predmet

Jeremić, direktor Autosemberije, preduzeća u sklopu Bobar grupacije, više mjeseci bio je nedostupan pravosudnim institucijama BiH, a iz

Salihović je u aprilu kazao kako je minimalna šteta nastala u aferi Bobar oko 150 miliona eura, te da je to predmet dva do tri puta jači od slučaja Sanader

Tužilaštva su ponovo podsjetili da je istraga vezana za poslovanje Bobar banke "složeni predmet iz oblasti organizovanog i finansijskog kriminala i najopsežniji u postdejtonskoj BiH".

Osumnjičeni će biti predat postupajućem tužiocu, koji će ga ispitati i donijeti odluku o daljim aktivnostima, dodaje se u saopštenju Tužilaštva BiH i ističe kako se intenzivno radi na predmetu, da je istraga u završnoj fazi i očekuje se odluka tužioca.

U ranijim akcijama, koje su proveli istražiocu SIPA, uhapšeno je deset lica na području

Bijeljine, Banje Luke i Zvornika, zbog postojanja osnovane sumnje da su počinili organizovani kriminal. Među uhapšenima u aprilu ove godine su i direktorice Agencije za bankarstvo Republike Srpske Slavica Injac i entitetske Investiciono-razvojne banke Snežana Vujnić.

Podsjećamo, Bobar banka likvidirana je 2014. godine, a na njenim su računima ostali blokirani milionski depoziti koje je sada nemoguće naplatiti. Bobar banku osnovao je privatni preduzetnik iz Bijeljine Gavrilo Bobar s prvotnom idejom da radi isključivo kao finansijska institucija u okviru Bobar grupacije.

Izmjena statusa

Ekonomista Zoran Pavlović istakao je da su se problemi pojavili kada je Bobar banka dobila status komercijalne banke, iako za to nije imala realnu finansijsku podlogu. Pokojni Gavrilo Bobar bio je član SNSD-a i poslanik te stranke u Narodnoj skupštini RS-a, a brojne javne kompanije su pod političkim utjecajem poslovale upravo preko ove banke, položivši na račune sredstva u milionskim iznosima.

U intervjuu za Oslobodjenje glavni tužilac BiH Goran Salihović istakao je da je Bobar banka "ogroman predmet i može svašta povući za sobom". On je izrazio nezadovoljstvo odlukom Suda BiH da za deset osoba koje su pod istragom u tom slučaju odredi kućni umjesto pravog pritvora, te podsjetio da su brojne slične odluke državnog Suda osumnjičeni u nekoliko navrata zloupotrijebili bijegom u inostranstvo ili opstrukcijom istrage. No, sada je, prema zvaničnim navodima, iznos štete smanjen za 20 miliona eura.

GORDANA KATANA



Tužilaštvo: Najopsežniji predmet u postdejtonskoj BiH